

四庫全書

子部

欽定四庫全書

名賢氏族言行類稿卷四十

宋 章定 撰

柳七百二十五

姓纂周公孫魯孝公子展展孫無駭以王父字為展氏至展禽食采於柳下遂姓柳氏魯滅仕楚秦并天下柳氏遂遷於河東河東解縣秦末有柳安下惠裔孫也

禮記檀弓下衛獻公出奔反於衛及郊將班邑於從者而後入柳莊曰如皆守社稷則孰執羈勒而從如皆從則孰守社稷君反其國而有私也毋乃不可乎弗果班衛有太史曰柳莊寢疾公曰君疾革雖當祭必告公奔拜稽首請於尸曰有臣柳莊也者非寡人之臣社稷之臣也

孟子柳下惠聖之和者也

南史柳元景字孝仁宋文帝大舉北侵以為建威將軍

大破魏師其威信著於境外焉後遷尚書令

柳世隆字彥緒元景弟子也幼孤挺然自立不與衆同
宋孝武以為武威將軍上庸太守性清廉唯盛事
墳典以清名遺子孫後授左僕射少立功名晚專
以談義自業善彈琴世稱柳公雙瑣為士品第一

柳惔字文通世隆次子少與兄悅齊名王儉曰柳氏二
龍可謂一日千里仕梁為太子詹事武帝貽惔詩曰
爾實冠羣后惟余實念功尋遷左僕射

柳惲字文暢惲之弟與謝淪友愛淪曰宅南柳郎可為
儀表早有令名少工篇什仕梁歷秘書監為
吳興太守為政清靜人吏懷之少子偃字彥游年
十二梁武帝引見問讀何書對曰尚書又問有何美
句對曰德惟善政政在養民衆咸異之

柳澄字文深惲之弟好立言通老易為蜀郡太守廉恪
為政益郡懷之

柳忱字文若澄之弟仕梁授給事中

柳慶遠字文和元景弟之子為雍州刺史梁武帝餞於
新亭謂曰卿衣錦還鄉朕無西顧憂矣累遷侍中
子津字元舉歷太子詹事津子仲禮勇力兼人
少有膽氣稍遷司州刺史梁武帝思見其面使畫工
圖之仲禮弟敬禮

柳叔夜河東人年十六為新野太守甚有名績

北史柳崇字僧生方雅有器量舉秀才射策高第子
慶和性沉靜不競於時其弟楷字士則善草書頗涉

文史

柳蚪字仲盤徧受五經兼涉子史耕於陽城有終焉之志厥後仕周除祕書丞領著作性脫略人間不事小節敝衣蔬食未嘗改操其弟檜字季華從周文戰於河橋以功授都督鎮鄆州吐谷渾不敢為寇

柳慶字更興天性質直無所回避周文帝深委任之位至左僕射其子機字匡時隋初徵為納言性寬簡有雅望機子述字業隆仕隋判吏部尚書職務脩理

為當時所稱 機弟弘字匡道嘗報聘於陳專對敏
捷見稱於時 弘弟旦字匡德拜龍川太守郡人好
相攻擊旦為開釋學校大變其風 旦弟肅字匡仁
授太子洗馬陳使來詔肅宴接時論稱其華辯 機
從子謩之字公正以明經擢第後歷兵部侍郎

柳敏字白澤事母以孝聞周文時為郢州刺史甚得物
情後拜禮部久處臺閣明練故事甚于昂字千里仕
周為內使中大夫竭誠獻替知無不為其子調歷侍

御史楊素見調因曰柳條通弱體獨搖不須風

柳遐字子昇仕梁遷尚書功論郎謝舉與語嘉之曰江漢英靈見於此矣入周拜霍州刺史道人務先以德下感而化不復為過咸曰我君仁惠如此其可欺乎其子靖字思休仕周歷河南德廣二郡守莊字思敬少有器量博覽墳籍蔡大寶見之歎曰襄陽水鏡復在於茲

柳裘字茂和仕隋拜許州刺史在官清簡吏人懷之

柳或字幼文仕隋遷侍御史當朝正色甚為百寮敬憚
文帝嘉其正直謂曰大丈夫當立名於世無容容而
已又曰柳或正直之士國之龜寶也或之處憲臺
姦邪自肅持節巡河北奏免長吏贓汙者二百餘
人州縣肅然莫不震懼

柳謦字顧言少聰敏讀書所覽將萬卷隋時為東宮學
士有所顧問應答如響

循吏柳儉字道約仕隋以仁明著稱擢拜蓬州刺史獄

訟庭決遣之佐吏從容而已獄無繫囚特拜弘化太守清節愈勵後入朝郡國畢集帝謂吏部尚書牛弘曰其中清名天下第一者為誰乃以儉對賜帛二百匹唐柳澤蒲州人風度方嚴景雲中為右率府鎧曹參軍數上書言事睿宗善之開元中為鄭州刺史卒其從祖範貞觀中為侍御史時吳王恪好田獵範彈治之太宗嘗曰何廷折我範諫曰主聖則臣直陛下仁明臣敢不盡愚帝乃解

柳芳字仲敷蒲州人開元末擢第進士肅宗詔芳與韋述綴輯吳兢所次國史起高祖迄乾元凡百三十篇柳冕字敬叔芳之子博學富文辭且世史官父子並居集賢院為太常博士德宗親郊重祀事動稽典禮冕據禮以對

柳渾字夷曠擢進士第棄隱武寧山召拜監察御史左丞田季羔從子伯強請賣私第募兵助討吐蕃渾曰討賊自有國計豈容不肖毀門徼一時倖帝納之

方渾瑊與吐蕃會平涼帝語大臣以和戎息師之便
馬燧賀曰今日已往可百年無患渾曰吐蕃難以信
結帝變色曰渾儒生未達邊事夜半韓游瓌飛奏吐
蕃劫盟帝大驚明日慰之曰卿儒士乃知軍戎萬里
情乎益禮異之時宰相張延賞專權嫉渾守正遣親
厚謂曰明公舊德第慎言於朝則位可久渾曰為我
謝張公頭可斷而舌不可禁

柳識字方明知名士也工文章與蕭穎士元德秀劉迅

相上下當時作者伏其簡拔

柳公綽字孝寬京人始生三日伯父子華曰興吾門者
此兒也幼孝友起居皆有禮法屬文典正不讀非聖
書舉直言極諫賢良方正一年再登其科授渭南尉
歲歉家飯不過一器及為吏部郎中憲宗數游畋公
綽奏太醫咸以諷天子高其才置之座隅嘗拜山南
東道節度使行部至鄧縣吏有納賄舞文二人縣令
以公綽素持法謂必殺貪者公綽判曰賊吏犯法法

在姦吏壞法法亡誅舞文者公綽居喪毀墓三年
嘗曰吾莅官未嘗以私喜怒加於人子孫其昌乎

柳仲郢字諭蒙公綽之子幼嗜學嘗和熊膽以助勤長
工文著尚書二十四司箴為韓愈咨賞元和末及進
士第牛僧孺辟武昌幕府有父風矩僧孺歎曰非積
習名教安及此邪會昌初轉吏部郎中時詔減冗
官者仲郢條簡決日損千二百五十員議者歎伏嘗
拜京兆尹人無敢犯政號嚴明宣宗初復出河南

尹以寬惠為政或言不類京兆時荅曰輦轂之下先
彈壓郡邑之治本惠養烏可類乎當咸通中為太平
節度使仲郢初為諫議大夫後每遷必烏集升平第
庭樹戟架皆滿五日乃散及是不復集方嚴尚氣
義事親甚謹每私居束帶正服色父子更九鎮五為
京兆再為河南不奏瑞不度浮屠摘貪吏濟單弱每
旱潦必貸匱蠲負里無逋家衣冠孤女不能自歸者
輒代為婚嫁在朝非慶弔不至宰相第家有書萬卷

所藏必三本

柳玘仲郢子以明經補祕書正字為嶺南節度副使廨中橘熟既食乃納直於官拜御史大夫直清有父風玘常述家訓以誡子孫曰夫門第高者一事墜先訓則異他人雖生可以苟爵位死不可見祖先地下又曰憂則恐懼恐懼則福至受福則驕奢驕奢則禍至

柳公權公綽第年十二工辭賦元和初擢進士第穆宗

曰朕嘗於佛廟見卿筆蹟思之久矣即拜侍書學士
帝問公權用筆法對曰心正則筆正筆正乃可法時
帝荒縱故及之帝改容悟其以筆諫也嘗從幸未央
宮帝駐輦曰朕有一喜邊戍賜衣久不時今仲春衣
已給當賀我以詩應聲成文婉切而麗詔令再賦復
無停思天子甚悅曰子建七步爾乃三馬公權博
經術通音律其書法結體勁媚自成一家文宗嘗
召與聯句帝曰人皆苦炎熱我愛夏日長公權屬曰

薰風自南來殿閣生餘涼帝以詞情俱足命題於殿
壁字率徑五寸歎曰鍾王無以尚也當時大臣家碑
誌非其筆人以子孫為不孝外夷入貢者皆別署貨
貝曰此購柳書者凡公卿有書貺遺蓋鉅萬而主藏
奴或盜用嘗貯盃盃一筍滕識如故而器皆亡奴妄
言叵測者公權笑曰銀盃羽化矣不復詰唯筆研圖
籍自鐫秘之

柳宗元字子厚河東人少精敏絕倫為文章卓偉精緻

一時輩行推仰第進士博學宏詞科授校書郎貞元十九年為監察御史裏行俄貶永州司馬既竄斥因自放其堙厄感鬱寓諸文做離騷數十篇元和十年徙柳州刺史南方為進士者走數千里從宗元游經指授者為文辭皆有法世號柳柳州少時嗜進謂功業可就既坐廢不振其才實高名蓋一時云韓愈評其文曰雄深雅健似司馬子長崔蔡不足多也既沒柳人懷之廟於羅池愈因碑以實之

柳冲蒲州人好學多所研總初太宗命諸儒撰氏族志甄差羣姓其後門胄興替不常冲請改修其書至先天時書乃成號姓系錄後柳芳著論甚詳

柳并字伯存受業於蕭穎士

見穎士傳

皇朝柳開字仲塗大名人也父承翰仕至監察御史開幼警悟豪勇父顯德末為南縣令有盜入其家眾不敢動開年十三亟取劍逐之盜踰垣開揮劍斷其足二指及就學講說能究經旨舉進士第自五代以來

學者少尚義理有趙生者得韓文數十篇未達乃攜以示開開一見遂知為文之趣自是屬辭必法韓愈太宗征河東開從駕督糧適常潤有小寇遂以開知常州徙潤州開至治所招誘羣盜以奉金給之又解衣與賊酋置之左右或謂不可開曰彼失所則盜不爾則吾民也始懼死故假息鋒刃之下今推以赤心夫豈不懷未半歲境內輯寧拜監察御史召還知貝州徙代州葺城壘戰具諸將沮議因謂其從子浩

曰吾觀胡星有光雲從北來殆寇將至今諸將見疾
一旦寇至必危我矣即丐小郡得忻州敵果犯塞徙
滄州未至乃卒開著書號東郊野夫又號補亡先生
作二傳以見意

荀七百二十六

姓纂國語云黃帝之後有荀實荀參

通鑑子思言於衛侯曰荀變之材可將五百乘公曰吾
知其可將然為吏而食人二雞子故弗用也子思曰

夫聖人之官人猶匠之用木也取其所長棄其所短
故杞梓連抱而有數尺之朽良工不棄今君處戰國
之世選爪牙之士而以二卵棄千城之將此不可使
聞於隣國也

晉荀晞字道將轉尚書左丞廉察諸曹八坐以下皆側
目憚之進撫軍將軍都督青兗練於官事文簿盈積
斷決如流晞出屯以弟純領青州

北史荀顏代人嚴毅清直武力過人為洛州刺史抑彊

扶弱山蠻畏威不敢為寇當太和中歷都曹尚書品
方正好直言如荀顏之剛直亦有用之士乎

有七百二十七

風俗通有巢氏之後漢有有祿

史記有若魯人孔子弟子孔子既沒弟子思慕有若狀
似孔子相與共立為師師之如夫子時也他日弟子
進問有若默然無以應弟子起曰有子避之此非子
之座也

紐七百二十八

北史孝行紐因字孝政父母喪廬墓負土成墳廬前生
麻一株圓之合拱冬夏恒青周武帝表其閭擢授
甘棠令其子士雄喪父復廬墓庭槐枯死服闋還宅
死槐復榮隋文帝下詔褒揚號其居為累德里

隋書孝義紐回

后七百二十九

姓纂后土之後漢有少府后會

史記后處字子里齊人孔子弟子

郇
七百三十

風俗通魯大夫后昭伯食采於郇因氏焉

鈕
七百三十一

東晉鈕滔吳興人

酒
七百三十二

周禮酒正因官命氏

糗
七百三十三

風俗通漢有嬴長糗宗

壽七百三十四

風俗通吳王壽夢之後吳大夫壽於姚漢末兗州牧壽良

酉七百三十五

風俗通傳酉氏黃帝之後見國語魏志有酉收陳留人

美
古牖字
七百三十六

美里獄官子孫氏焉見纂要

曰七百三十七

左傳華氏家臣曰任

舅七百三十八

晉大夫舅犯之後亦作咎

咎七百三十九

風俗通湯司空咎單左傳咎犯即舅字

耦七百四十

風俗通云宋卿華耦之後漢有侍中耦嘉

口七百四十一

羌種也今同州有此姓

耿七百四十二

姓纂殷時侯國為晉所滅因氏焉尚書祖乙圮于耿是也

後漢耿弇字伯昭扶風茂陵人父況上谷太守弇好將帥之事拜建威大將軍封好時侯自請收上谷兵定漁陽取涿郡攻張步以平齊地光武謂曰昔韓

信破歷下以開基今將軍攻祝阿以發迹獨拔勍敵
攻難於信前建此大策常以為落落難合有志者事
竟成凡平郡四十六屠城三百未嘗挫折累葉
以功名自終弟國字叔慮為中郎將

耿秉字伯初國之子有偉體腰帶八圍博通書記能說
司馬法尤好將帥之略拜度遼將軍匈奴懷其
信及卒匈奴舉國號哭或至髻面流血其弟夔字定
公少有氣節為太將軍左校尉將精騎八百出居延

塞斬關氏名王去塞五千里而還

耿恭字伯宗慷慨多大略有將帥才與匈奴戰據疏勒城城中穿井十五丈不得水乃整衣冠向井再拜有頃水泉奔出耿氏自中興以後大將軍二人將軍九人卿十三人尚公主三人列侯十九人中郎將護羌校尉及刺史二千石數十百人與漢興衰

耿純字伯山鉅鹿人光武時願試治一郡盡力自効迺拜東郡太守盜賊清寧後封東光侯

北史耿豪

本名令貴

少麤獷有武藝沙苑之戰血染甲裳盡

赤周文嘆曰令貴武猛所向無前芒山之戰右手拔

刀左手把稍

藝術耿玄耿詢

丙七百四十三

姓纂齊大夫丙歟之後漢功臣表有高苑侯丙猜傳

封八代

前漢丙吉字少卿魯國人封博陽侯為丞相掾吏有

罪臧予長休告終無所按驗因馭吏言而科瑣邊吏
見謂憂邊思職不問羣鬪死傷而問牛喘孝宣中興
丙魏有聲

邴七百四十四

姓纂晉大夫邴豫食米於邴因氏焉齊有邴意茲

魏志邴原字根矩少以操尚稱太祖署丞相徵事清靜
足以厲俗貞固足以幹事龍翰鳳翼國之重寶後為
五官將長史閉門自守非公事不出

井七百四十五

姓纂穆天子傳周有大夫井利又天子與井公博左
傳虞大夫井伯漢有司徒掾井宗

後漢井丹字大春通五經善談論京師語曰五經紛綸
井大春性清高未嘗修刺候人

景七百四十六

姓纂芊姓楚公族也漢初徙山東豪族於關中今好
時華陽諸景是也楚有景差漢有景風

後漢景丹字孫卿馮翊人縱突騎以破王郎光武以
為驃騎大將軍封櫟陽侯

儒林景鸞字漢伯能理齊詩施氏易作易說及詩解文
句凡著述五十餘萬言數上書陳救災變之說

穎七百四十七

左傳鄭大夫穎考叔為穎谷封人穎考叔純孝也愛其
母施及莊公公孫闕與考叔爭車考叔挾輶而走

後漢儒林穎容字子嚴博學多通善春秋左氏舉孝廉

不就著春秋左氏條例五萬餘言

辛七百四十八

晉藝術辛靈建昌人與小人羣居見侵辱而無愠色邑里號之癡人療病即愈百姓奔赴水陸輻輳

靖七百四十九

風俗通單靖公之後以謚為姓一云齊田氏之族靖郭君之後

冷又音零
七百五十

冷淪氏之後音訛為冷氏

秉七百五十一

漢有秉寬

省七百五十二

左傳宋有省臧

猛七百五十三

左傳宋有猛獲



名賢氏族言行類稿卷四十

欽定四庫全書

子部

名賢氏族言行類稿卷四十一

一至三

詳校官典籍

臣

潘奕雋

主事

臣

祁韻士覆勘

總校官進士

臣

朱鈐

校對官主事

臣

馮培

謄錄監生

臣

侯軒

欽定四庫全書

名賢氏族言行類稿卷四十一

宋 章定 撰

沈七百五十四

姓纂周文王第十子聃季食采於沈因氏焉今汝南
平輿沈亭即沈子國也秦有沈郢徵丞相不就

左傳沈尹戌楚沈尹也為左司馬葉公子高姓沈名
諸梁沈尹戌之子為葉大夫

晉書沈勁字世堅吳興男子守洛陽城陷為慕容恪所害恪曰今定洛陽而殺沈勁實有愧於四海

沈充字士居少好兵書以雄豪聞於鄉里

南史沈懷文字思明少好玄理善為文章孝武時遷尚書吏部郎三子淡深沖沖字景綽與兄淡深名譽有優劣士號為腰鼓兄弟三人並歷御史中丞皆為司直晉宋所未有曇慶懷文從父兄仕宋位尚書左丞

沈演之字臺真沈氏家世為將而演之折節好學在
宋舉秀才為嘉興令有能名為右衛將軍加侍中文帝
曰侍中領衛望實優顯此蓋宰相便坐卿其勉之

沈顗字處默讀書不為章句著述不尚浮華齊永明中
徵拜著作郎不起

沈憲字彥璋少有幹局為駕部郎在宋補烏程令甚
著政績齊高帝以憲帶山陰令政聲大著孔珪曰
沈令料事特有天才

沈浚字叔源憲之孫仕梁歷山陰吳建康三縣並有能
名累遷御史中丞

沈慶之字弘先仕宋為建威將軍大破山蠻威震諸山
羣蠻皆稽顙慶之著狐皮帽羣蠻號曰蒼頭公每
見慶之軍輒畏懼曰蒼頭公已復來矣文帝將北
伐慶之固陳不可上使徐湛之等難慶之慶之曰今
欲伐國而與白面書生輩謀之事何由濟自五校
而登三事文季字仲達慶之次子風采稜岸善於

進止文秀字仲遠慶之弟子善於撫御被魏園三載無叛者

沈攸之字仲達累遷郢荆二州刺史

沈約字休文博通羣籍善屬文才智縱橫可謂明識

梁武立累遷為尚書令博物洽聞當世取則立

宅東田曠望郊阜嘗為郊居賦以序其事子旋字

士規終南康內史孫衆字仲興梁武令為竹賦敕

曰卿文體翩翩可謂無忝爾祖

沈恪字子恭深沉有幹局仕陳為廣州刺史綏懷安輯被以恩惠嶺表賴之

沈君理字仲倫博涉有識鑒為吳興太守以幹理見稱沈炯字初明少有雋才為當時所重仕陳加散騎常侍循吏沈瑀字伯瑜為建德令教人種桑柿梨栗人咸悅為餘姚令權右屏跡

儒林沈峻字士嵩博通五經尤長三禮為國子助教子文阿字國衛通三禮三傳位五經博士

沈洙字弘道精識彊記五經章句諸子史書問無不荅
仕梁為尚書祠部郎

沈德威字懷遠少有操行後為國子助教講授道俗受
業數百人為尚書祠部郎

儒林沈不害字孝和博綜經典製文立成曾無尋檢周
弘正曰沈生可謂意聖人乎位光祿卿尚書左丞

孝義沈崇僚字思整郡縣舉至孝擢補太子洗馬旌其

門閭

隱逸沈道虔武康人好老易居縣北石山精廬州府凡
十二命皆不就

隱逸沈麟士字雲禎博通經史有高尚之心隱居於吳
差山講經教授從學士數十百人時語曰差山中有
賢士開門教授居城市時號織簾先生

北史沈文秀字仲遠歸魏除懷州刺史守清貧而政寬
大興水田公私頗有利益

儒林沈仲字子厚博覽羣書尤明詩及左氏春秋梁時

除五經博士嘗講三教義於紫極殿朝士儒生桑門道士至者二千餘人

唐沈既濟蘇州人經學該明楊炎雅善之薦既濟有良史才召拜左拾遺史館脩撰

沈傳師既濟子材行有餘能治春秋工書有楷法少為杜佑所器貞元末舉進士許孟容權德輿樂挽轂士號權許德輿稱之於孟容孟容曰我故人子盍不過我傳師往謝遂擢第德輿門生七十人推為顏子復登

制科召入翰林為學士改中書舍人翰林缺承旨次
當傳師穆宗欲面命辭曰學士院長參天子密議次
為宰相臣自知必不能願治人一方為陛下長養之
因稱疾以本官兼史職出為湖南觀察使 性夷粹
無競更二鎮十年無書賄入權家初拜官宰相欲以
姻私託幕府者傳師固拒曰誠爾願罷所授故其僚
佐如李景讓蕭真杜牧極當時選云

沈伯儀湖州人武后時為太子右諭德

沈佺期字雲卿相州人及進士第兼脩文館學士侍宴
帝詔學士等舞回波佺期為弄辭悅帝

沈法興湖州人義寧二年趨江都衆六萬定江表十餘
州

宋朝沈倫字順宜開封太康人也周顯德初太祖領同
州節制辟在幕府開寶六年拜中書侍郎同平章事
集賢殿大學士請老復授左僕射致仕卒謚恭惠

沈括字存中吳興人也博覽古今於書無所不通舉進

士為揚州司理參軍編校昭文館書籍熙寧間除太子中允為檢正中書刑房公事遷集賢校理察訪兩浙農田水利遷太常丞同脩起居注邊吏報北人將入寇亟遣中貴人取兩河民車以為戰備民大驚擾自宰執以下言不便者牆進俱不省一日括持筆立御坐側神宗顧曰卿知籍車之事乎括曰未知車將何用神宗曰北人以多馬取勝唯車可以當之括曰敵之來民父子墳墓田廬皆當棄去復暇卹車乎朝

廷姑籍其數而未取何傷神宗曰卿言有理何論者
之紛紛也括曰車戰之利見於歷世巫臣教吳子以
車戰遂伯中國李靖用偏箱鹿角車以擒頡利臣但
未知一事古人所謂輕車者兵車也五御折旋利於
輕速今之民間輜車重大椎樸以牛挽之日不能三
十里少蒙雨雪則跬步不進故俗謂之太平車或可
施於無事之日恐兵閒不可用耳神宗益喜曰無人
如此語朕者當更思之明日遂罷籍民車執政問括

曰君以何術而立談罷此事上甚多太平車之說也
括曰聖主可以理奪不可以言爭若車可用其敢以
為非未幾以右正言知制誥察訪河北西路出使遼
國使還以淮浙災傷為體量安撫使權三司使遷翰
林學士以言者罷知青州尋知延州王師大舉伐
西夏种諤帥師入銀夏州而不能有明年括請城永
樂命徐禧李舜舉計議邊事李稷主糧餉遂城永樂
距銀州五十里米脂五十里城成賜名銀川砦既而

賊二十萬重圍永樂城攻益急城陷於是漢蕃官二百三十人兵萬二千三百人皆沒焉禧舜舉稷死之神宗以括始議責為均州團練副使隨州安置徙秀州復光祿卿分司南京以卒

審七百五十五

漢辟陽侯審食其為左丞相沛人

暉七百五十六

後漢書武落鍾離山黑穴有暉氏

枕七百五十七

姓苑云下邳人

范七百五十八

姓纂帝堯劉累之後在周為唐杜氏周宣王滅杜杜伯之子隰叔奔晉為士師曾孫士會食采於范遂為范氏魏有范痤項羽謀臣范增居巢人

左傳襄二十七年子木問於趙孟曰范武子之德如何對曰夫子之家事治言於晉國無隱情

昭五年韓起之下魏舒范鞅皆諸侯之選也

成十六年楚壓晉軍而陳軍吏患之范匄曰塞井夷竈
陳於軍中晉楚唯天所授何患焉

成十七年晉范文子反自鄢陵使其祝宗祈死曰君驕
侈而克敵難將作矣使我速死無及於難范氏之福
也

史記范雎字叔魏人一飯之德必償睚眦之怨必報

事須賈使齊襄王賜金及牛酒須賈知之以告相魏

齊齊莒擊雖折脅摺齒以懲後令無妄言者雖佯死
得出入秦說昭王後拜相須賈使秦雖聞之敝衣微
行之卽見賈賈驚曰范叔固無恙乎留與坐飲食乃
取一綈袍賜之雖歸取大車駟馬為賈御入秦相府
賈待門下良久問門下曰范叔不出何也門下曰乃
吾相君也賈大驚自知見賈乃肉袒膝行因門下人
謝罪曰不意君能自致青雲之上雖曰汝所以得無
死者以綈袍戀戀有故人之意故釋公

貨殖傳范蠡師事計然蠡用於越既雪會稽之耻乃乘扁舟浮於江湖變名易姓適齊為鴟夷子皮之陶為朱公乃治產積居與時逐利十九年之中三致千金再分散與貧交疏昆弟故言富者皆稱陶朱公

後漢范滂字子廬有清行為漁陽太守以智略安邊匈奴不敢入界後為司徒其妻謂曰君有四子而無立錐之地可餘俸祿以為後世業滂曰吾備位大臣而蓄財求利何以示後世

范升字辨卿光武徵為博士奏左氏之失凡十四事

黨錮范滂字孟博汝南人少厲清節為州里所服冀

州饑荒以滂為清詔使按察之登車攬轡慨然有澄清天下之志及至州境守令自知臧汙望風解印綬去

范冉

或作丹

字史雲好違時絕俗為激詭之行為萊蕪長

後辟太尉府以狷急不能從俗常佩韋於朝間里歌

曰甌中生塵范史雲釜中生魚范萊蕪

范式字巨卿少游太學與張劭為友並告歸鄉式曰後

二年當還將過拜尊親見孺子焉乃共剋期日後方至劭白母請設饌候之母曰二年之別千里結言何相信之審邪曰巨卿信士必不能違至日巨卿果到升堂拜飲盡歡而別

晉范汪字玄平王澄奇之曰興范宗者必是子也博學多通善談名理後歷徐兗二州刺史子甯字武子少篤學多所通覽為餘杭令興學校養生徒志行之士莫不宗之遷臨淮太守

范喬字伯孫外黃人前後辟舉皆不就

范堅字子常博學善屬文拜著作佐郎遷尚書右丞

子啟字榮期以才義顯於當世為秘書郎中黃門侍郎父子並有文章傳於世

良吏范晷字彥長轉馮翊太守甚有政能

儒林范平字子安錢唐人研覽墳典遍該百氏舉茂才

遷臨海太守政有異能 卒謚曰文貞先生 三子

爽咸泉並以儒學至大官

范隆字玄嵩著春秋三傳撰三禮吉凶宗紀甚有條義
儒林范宣字宣子十歲能誦詩書常以講誦為業皆聞
風宗仰自遠而至諷讀之聲有若齊魯曰是江州人
士並好經學化其風也 子輯歷郡守國子博士
儒林范弘之字長文以儒術該明為太學博士

范粲字承明博涉彊記學皆可師

南史范泰字伯倫武帝甚賞愛之領國子祭酒博覽篇
籍好為文章愛獎後生孜孜不倦 子暄字蔚宗

范柏年初見宋明帝言次及廣州貪泉因問卿州復有此水否答曰梁州惟有文川武鄉廉泉讓水又問卿宅在何處曰臣所居廉讓之間帝嗟其善答因見知歷任內外終梁州刺史

宋朝范質字文素大名宗城人也母張氏夢人授五色筆而質生九歲善屬文唐長興中舉進士為忠武軍推官晉天福中懷其文見宰相桑維翰維翰奇之擢監察御史稍遷主客員外郎直史館召入翰林為學

士契丹入寇晉出帝命十五將出征是夕質宿直出
帝命諸學士分草制質曰宮城已閉慮泄機事遂獨
為之辭理優贍當時文士皆歎服周太祖征李守貞
每朝廷遣使齎詔處分軍事皆中機會太祖問誰為
此辭使者以質對太祖曰宰相器也太祖起兵入京
師遽令草太后詔及議迎湘陰公儀注乃白太后以
質為兵部侍郎樞密副使周廣順初拜中書侍郎同
平章事集賢殿大學士兼參知樞密院事世宗時累

加司徒洪文館大學士恭帝即位封蕭國公北邊奏
太原劉承鈞結契丹入寇乃命我太祖北征為六師
推戴自陳橋入城還府第時質方就食閣中聞太祖
入率王溥魏仁浦就府謁見質執溥手曰倉卒遣將
吾儕之罪也太祖既即位加兼侍中仍以為相乾德
初封魯國公初和凝知貢舉愛質所試文自以中第
十三名故亦以處質其後質官及封國皆與凝同當
時謂之傳衣鉢 太宗嘗言近世輔弼循規矩惜名

器持廉節無與質比者但欠世宗一死為可惜爾

子旻兄子杲

范雍字伯純世居河東其曾祖仁恕從孟氏入蜀為相
祖龜從昶歸朝為左屯衛將軍父德隆為供奉官葬
河陽因家焉雍舉進士為洛陽簿後知河南遷禮部
尚書卒謚忠獻 雍子宗傑至兵部員外郎直史館
孫子奇紹聖間為吏部侍郎寶文閣待制子奇之子
坦政和中為戶部侍郎

范仲淹字希文唐相履冰之後其先邠州人也後徙蘇州祖贊時仕錢氏為秘書監父墉從錢俶歸京師後為武寧軍掌書記以卒仲淹二歲而孤母貧無依改適長山朱氏故冒朱姓名說舉進士為廣德軍司理參軍始歸迎其母以養仲淹少有大志於富貴貧賤毀譽歡戚一不動其心而慨然有志於天下嘗自誦曰士當先天下之憂而憂後天下之樂而樂此其志也為楚州糧料院母喪去官自言不敢以一身之戚

而忘天下之憂乃上書宰相極論天下事所言皆執政時所施行者也宰相王曾見而竒之晏殊知應天府表掌府學及終喪乃歸宗易今名時晏殊在京師薦一士為館職曾謂殊曰公知范仲淹捨不薦而他薦乎公宜更薦范仲淹也殊從之遂用為秘閣校理進樞密直學士右諫議大夫尋拜陝西四路安撫緣邊招討使 仲淹與韓琦俱有威名軍中為之語曰軍中有一韓西賊聞之心骨寒軍中有一范西賊聞

之驚破膽居三歲士勇邊實恩信大洽乃決策謀取
橫山復靈武而元昊數遣使來請和初西人籍為鄉
兵者十數萬旣而黥以為軍惟仲淹所部刺其手仲
淹罷去兵獨得復為民仲淹在邊其所施設去而人
德之與守其法不敢變也自仲淹坐夷簡貶羣士大
夫各持二人曲直夷簡患之凡直仲淹者皆指為黨
或坐竄逐及夷簡復相仲淹再起被用於是歡然相
得戮力平賊天下兩賢之召拜樞密副使以疾請

知鄧州加給事中知杭州再遷戶部侍郎徙青州疾甚請潁州未至卒謚文正 仲淹為人外和內剛樂善泛愛喪其母時尚貧終身非賓客食不重味臨財好施意豁如也及退而視其私妻子僅給衣食姑蘇之范皆疎屬而置義庄以周急之天下想聞其風采賢士大夫以不獲登其門為耻 仲淹復本姓謝啟曰志在投秦入境遂稱於張祿名非霸越乘舟乃效於陶朱以范雎范蠡皆改姓也少作金在鎔賦云如

令區別妍媸願為軒鑑若使削平禍亂請就干將則
自負將相器業文武全材槩可見矣子純祐純仁純
禮純粹

范鎮字景仁成都華陽人也薛奎守蜀還朝或問奎入
蜀所得曰得一偉人當以文學名於世謂鎮也舉進
士禮部奏名第一故事殿廷唱第過三人則禮部第
一人者必越次抗聲自陳因擢置上第鎮不肯自言
至第七十九人乃出拜退就列無一言廷中皆異之

釋褐為新安簿王舉正薦召試擢館閣校勘宰相龐
籍言鎮有異材不汲汲於進取特除直祕閣開封府
推官擢起居舍人知諫院神宗即位復還翰林兼侍
讀知通進銀臺司王安石為政變更法令改常平為
青苗法鎮上疏曰常平之法始於漢之盛時視穀貴
賤發歛以便農末最為近古不可改而青苗行於唐
之衰亂不足法且陛下疾富民之多取而少取之此
正百步與五十步之間耳今有二人坐市貿易一人

下其直以相傾奪則人皆知惡之其可以朝廷而行
市道之所惡乎 年六十三即上言臣言不行醜顏
復立於朝請致仕疏五上最後指言安石曰臣言青
苗不見聽一可去薦蘇軾孔文仲不見用二可去今
有人言獻忠與獻佞孰是必曰獻忠是納諫與拒諫
孰是必曰納諫是蘇軾與孔文仲可謂獻忠矣陛下
拒而不納是必有以獻佞誤陛下者不可不察也若
李定避持服遂不認母是壞人倫逆天理也而欲以

為御史御史臺為之罷陳薦舍人院為之罷宋敏求
李大臨蘇頌諫院為之罷胡宗愈王韶上書肆意欺
罔以興坐邊事事敗則置而不問反為之罪帥李師
中及御史一言蘇軾則下七路掎摭其過孔文仲則
遣之歸任以此二人況彼二人以此事理觀彼事理
孰是孰非孰得孰失陛下聰明之主其可以逃聖鑒
乎言青苗則曰有見效者豈非歲得緡錢什百萬緡
錢什百萬非出於天非出於地非出於建議者之家

一出於民民猶魚也財猶水也水深則魚活財足則民有生意養民而盡其財譬猶養魚而竭其水也陛下有納諫之資大臣進拒諫之計陛下有愛民之性大臣有殘民之術臣職獻替而無一言則負陛下矣臣知言入觸大臣之怒罪在不測雖然臣嘗以忠事仁祖仁祖不賜之死才聽解言職而已以禮事英宗英宗不加之罪才令補畿郡而已所不以事仁祖英宗之心而事陛下是臣自棄於此世也安石怒落翰

林學士以戶部侍郎致仕鎮上表謝其略曰雖曰乞身而去敢忘憂國之心又曰望陛下集羣議為耳目以除壅蔽之姦任老成為腹心以養和平之福天下聞而壯之 卒謚忠文 猶子百祿從孫祖禹

范百祿字子功父鍇為衛尉寺丞鎮之兄也少力學中進士第又中制科治平中以秘書丞知濛陽縣熙寧間擢提點江東刑獄徙利州梓州兩路加集賢院召還同知諫院久之入為司門郎中遷吏部除起居郎

召試中書舍人除刑部侍郎進翰林學士除龍圖閣學士知開封府拜中書侍郎出知河中府徙河南未行卒

范祖禹字淳父祖錯父百祿太常博士祖禹舉進士為校書郎知龍水縣司馬光辟同編修資治通鑑凡十五年書成光上章稱薦曰臣誠不及也由臣頑固纂次淹久致其沉淪而祖禹安恬靜默若將終身者除秘書省正字召試中書舍人又辭不拜遷右諫議大

夫兼實錄院脩撰因召對勸哲宗以辯邪正曰比年
以來大臣以兼容小人為寬好惡不明邪正不分所
引進者不盡得人宰相以進賢退不肖為職而邪正
不分豈不負國望戒飭大臣各以公心求賢多引鯁
正之人以重朝廷無使小人得位為他日患 改禮
部侍郎進翰林侍讀學士知國史院事又為翰林學
士 宣宗登遐哲宗親政祖禹上言此乃宋室隆替
之本社稷安危之基天下治亂之端生民休戚之始

君子小人消長進退之際天命人心去就離合之時
也有敢以姦言惑聖聽者宜明正其罪既而外議恟
恟在位者多自引去祖禹力陳治道之要古今成敗
之理與夫小人之情狀反復激切以感動上意因請
外遂以龍圖閣學士知陝州紹聖初言者論祖禹所
脩實錄以為詆斥先帝又以祖禹為朋附司馬光及
論乳媪事以為離間兩宮初提舉明道宮繼責武安
軍節度副使永州安置再貶韶州別駕賀州安置移

賓州再移化州卒 祖禹嘗進唐鑑十二卷

啖七百五十九

姓纂前秦錄有將軍啖鐵 河東大厯水部郎中啖
彥珍會昌中進士啖鱗避武宗諱改為澹

唐啖助字叔佐趙州人淹該經術善為春秋考三家長
短縫綻漏闕號集傳凡十年乃成復攝其綱條為例
統

冉 七百六十

姓纂高辛氏之胤一云大夫叔山冉之後 雲安冉氏盤護之後冉駸之種類也代為巴東蠻夷酋帥

史記孔子弟子冉雍字仲弓冉耕字伯牛冉孺字子魯

一作曾

冉季字子產冉求字子有為季氏宰並魯人

冉有用矛於齊師故能入其軍孔子曰義也

減七百六十一

急就章有減罷軍

前漢減宣遷御史中丞

治淮南獄稱為最為御史

中丞者幾二十歲

咎

子臧反
七百六十二

晉書桓溫將咎堅唐有咎慎盈 宋朝咎居潤字廣川
博州高唐人也東都事略有傳

染

七百六十三

石趙錄云石季龍將染閔 魏郡內黃人或作冉氏篡
石趙號

奄

七百六十四

風俗通奄國名尚書成王既踐奄左傳秦奄息其後也

斂

七百六十五

姚秦錄有將軍斂憲斂方斂岐並南安人皆羌酋也

湛

七百六十六

後漢有大司農湛重 晉荊州刺史陶侃母湛氏新淦

人

名賢氏族言行類稿卷四十一

欽定四庫全書

名賢氏族言行類稿卷四十二

宋 章定 撰

宋 七百六十七

姓纂子姓殷王帝乙長子微子啓周武王封之於宋
傳國三十六代至君偃為楚所滅子孫以國為氏楚
有宋玉宋義宋昌

新序楚襄王問於宋玉曰先生何士民衆庶不譽之甚

也宋玉對曰鳥有鳳而魚有鯢夫聖人瑰意琦行超然獨處世俗之民又安知臣之所為哉 作高唐賦後漢宋弘字仲子威容德器羣臣莫及封宣平侯

宋均字叔庠補辰陽長立學校禁絕淫祀遷九江太守虎相與東游度江 拜尚書令

宋意字伯志累遷司隸校尉竇憲兄弟放縱負勢意隨舉奏無所回避

宋登字叔陽少傳尚書教授數千人為汝陰令政為明

能號稱仲父 出為潁川太守市無二價道不拾遺
晉宋纖字令艾隱居酒泉南山太守馬岌造焉纖高樓
重閣拒而不見岌嘆曰名可聞而身不可見德可仰
而形不可覩今而後知先生人中之龍也 銘詩于
石壁曰其人如玉維國之琛 謚曰玄虛先生

韋逞母宋氏家世以儒學稱受周官音義苻堅憫周官
之學久廢乃就宋氏家立講堂置生員百二十人隔
絳紗帳而受業號宋氏為宣文君

忠義宋矩字處規慷慨有志節常曰辭父事君當立功
與義功義不立當守名節

北史宋隱字處默性至孝專精好學道武拜為尚書郎
及卒謂其子經曰汝等苟能入順父兄出悌鄉黨仕
郡幸而至功曹史以忠清奉之足矣不勞遠詣臺閣
恐汝不能富貴徒延門戶累耳 弟宣從子悆俱被
徵拜中書博士

宋瓊字普賢以孝稱母曾病季秋思瓜瓊夢想見之求

而遂獲時人異之

宋弁字義和與李冲言論移日冲曰此人一日千里王佐才也為尚書殿中郎中孝文因朝次歷訪政道弁年少官微自下而對聲姿清亮進止可觀帝善者久之遷中書侍郎

宋欽道仕齊位中山太守長於撫綏徵為黃門侍郎令在東宮教太子吏事

宋翻字飛鳥少有操行初為河陰令縣有舊大枷號曰

彌尾青主吏請焚之翻曰置南牆下以待豪右威振京師

宋世良字元友為殿中侍御史詣河北括戶大獲浮惰齊孝莊勞之曰知卿所括得丁倍於本帳若官人皆如此心便是更出一天下也嘗見汲郡城旁多骸骨移書州郡悉令收瘞其夜甘雨滂沱後拜清河太守在郡未幾聲聞甚高郡東南有曲堤羣盜多萃於此世良施八條之制盜奔他境謠曰曲堤雖險

賊何益但有宋公自屏跡 後大赦郡無一囚率羣吏拜詔而已獄中魯生桃樹蓬蒿亦滿每日牙門虛寂無復訴訟者謂之神門其冬醴泉出界內及代至傾城祖道有老人丁金剛者泣曰老人記三十五政府君非惟善政清亦徹底今失賢者人何以濟莫不攀轅涕泣

宋世軌幼自脩整好法律仕齊兼并州長史遷廷尉少卿寺中語曰視表見裏宋世軌南臺囚到廷尉世軌

多雪之

宋世景少自脩立事親以孝聞舉秀才上第遷法曹參軍裁斷刑獄剖判如流為滎陽太守終日坐聽事未嘗寢息人間事巨細必知發姦摘伏有若神明

宋繇字體業燉煌人仕梁武昭王歷位通顯家無餘財雖兵革間誦誦不廢曾孫遊道事母以孝聞仕魏為殿中侍御史齊文襄請為尚書左丞謂曰卿處北省當使天下肅清兗州人為立生祠堂像題

曰忠清君 遊道子士素沉密有才識趙彥深引入
內省歷黃門侍郎自處機近二十年周慎溫恭甚為
彥深所重

唐宋務光字子昂汾州人舉進士第神龍五年大水詔
文武九品以上直言極諫者務光乃上書云云奏不
省以考最進殿中侍御史

宋璟邢州人舉進士中第遷鳳閣舍人居官鯁正武后
高其才 張易之誣魏元忠璟曰名義至重不可陷

正人元忠免死 遷左臺御史中丞 神龍初為吏
部侍郎中宗嘉其直遷黃門侍郎武三思怙寵數有
請璟厲答曰主宜以侯就第安得尚干朝政 歷杭
相二州清正馭吏下無敢犯者 睿宗立以吏部尚
書同中書門下三品銓總平允 開元初徙廣州都
督廣人以竹茅茨屋多火璟教之陶瓦築堵始知棟
梁利而無患災召拜刑部尚書兼侍中廣人為璟立
遺愛頌 會日食上言云云願動天以誠無事空文

帝嘉納 十二年東巡泰山璟復為留守帝將發謂
曰卿國元老宜有嘉謀以遺朕璟因一二極言手制
荅曰所進當書之座右出入觀省以誠終身 張說
源乾曜宋璟同日除拜有詔大官設饌太常奏樂會
百官東堂帝賦三傑詩自寫以賜 風度凝遠人莫
測其量為宰相務清政刑使官人皆任職 張嘉貞
後為相閱堂按見其危言切論未嘗不失聲歎息

宋申錫字慶臣擢進士第長慶寶曆間風俗囂薄申錫

少孤直少與及進用議者謂可以激浮競

宋之問字延清汾州人偉儀貌雄于辯甫冠武后召與
楊炯分直習藝館武后游終南龍門詔從臣賦詩左
史東方虬詩先成后賜錦袍之問俄頃獻后覽之嗟
賞更奪袍以賜江左詩律屢變至沈佺期及之問號為
沈宋語曰蘇李居前沈宋比肩之問父令文富文
辭且工書有力世稱三絕既之問以文章起第之悌
以驕勇聞之孫精草隸世謂皆得父一絕

宋朝宋偓河南洛陽人也祖瑤唐天德軍節度使父延
浩尚後唐莊宗女義寧公主生偓仕至房州刺史晉
初為汜水關使張從賓之叛戰死之偓年十一以父
死事補內殿直遷供奉官漢高祖在晉陽遣其子承
訓至洛與偓結婚即永寧公主也 宋興李重進謀
以揚州叛偓察其情具以聞太祖令偓屯海陵以觀
變遂從征揚州為行營排陣使以功改鎮保信徙華
州又徙忠武開寶中太祖納偓長女為皇后徙鎮靖

難太平興國初加同平章事移鎮定國從平太原又
從征幽州太宗幸大名命偓知滄州封邢國公俄還
同州入為右衛上將軍雍熙中曹彬等北伐班師命
偓知霸州卒謚莊惠 偓唐莊宗之外孫漢高祖之
壻女即孝章皇后貴戚之盛鮮有其比然謙恭下士
人亦以此稱之始名延渥後易為偓云

宋琪字休實范陽薊人也晉天福中在契丹舉進士登
第幽帥趙延壽辟琪為從事因隨至京師太平興國

八年拜右諫議大夫為參知政事是歲太宗將用工部尚書李昉參預大政以琪先入乃超遷兵部尚書未幾與昉並拜同中書門下平章事琪自庶僚一歲中為宰相其速如此卒謚惠安

宋綬字公垂趙州平棘人也父皐直集賢院綬幼聰警其外祖楊徽之器愛之以徽之遺愛授太常寺太祝年方十五召試中書真宗竒其文聽於祕閣讀書久之召試學士院為集賢校理與父皐同在館閣世以

為榮入為右正言建言比歲下赦令釋逋負稽期未報者六十八州軍請諸路選人校之限半月以聞於是脫械繫三千二百人除逋負數百萬擢知制誥為翰林學士兼侍讀明道二年為參知政事景祐四年罷為尚書左丞資政殿學士留侍經筵卒謚宣獻子敏求

宋敏求字次道由秘書省正字歷館閣校勘遷右諫議大夫復知制誥在職六年李定自秀州判官除御史

裏行敏求封還其詞頭曰御史之官舊制須兩任通判方許奏舉後以資任相當者少始許舉通判未滿任者今定自幕職便處以糾繩之地臣恐弗循官制之舊未厭羣議再請解職遂罷久之為史館脩撰集賢院學士遷龍圖閣直學士脩國史卒

宋庠字公序開封雍丘人也舉進士開封禮部俱第一與弟祁同時有名以詩賦為學者所宗謂之二宋嘉祐三年拜樞密使同平章事封莒國公英宗即位封

鄭國公為景靈宮使出判亳州庠所至以靜鎮為治
末年信愛幼子頗致物議至是御史有言勿令其子
待庠之官英宗曰庠老矣奈何不使其子隨乎請老
以司空致仕卒謚元憲 庠性儉約不喜聲色讀書
至老不倦初名郊李淑在翰林因對言於仁宗曰宋
郊姓符國號名應祀天不祥也仁宗語之更焉

宋祁字子京與兄庠同試禮部會諒陰正奏名祁為第
一章獻皇后曰第可先兄乎乃以郊為第一而祁為

第十兄弟友愛甚篤初釋褐授復州軍事推官其兄
在政府乃加龍圖閣學士知鄭州初賈昌朝建議脩
唐書始令館職日供唐書所未載者二事附於本傳
命祁與王嘉臣楊察張方平為脩撰又命范鎮邵必
宋敏求呂夏卿為編脩而以昌朝提舉昌朝提舉王
疇編脩必以為史出衆手非是辭之昌朝罷相以丁
度兼領度卒劉沆代之沆罷王堯臣代之堯臣卒曾
公亮代之唐書初脩而堯臣以憂去方平察相繼出

外祁遂獨秉筆雖外官亦以藁自隨久之又命歐陽
脩刊脩分作紀志劉義叟脩律厯天文五行志將卒
業而梅堯臣入局脩方鎮百官表祁與范鎮在局一
十七年王疇一十五年宋敏求呂夏卿並各十年刊
纂紀志六十卷列傳一百十五卷至是書成祁進工
部尚書踰月拜翰林學士承旨復除羣牧使卒謚景
文祁非特文章有見於世其守邊誠兵雖古名將
不能過也

宋齊丘徐知誥以齊丘為謀主請蠲丁口錢自餘稅悉
輸穀帛紬絹匹直千錢者當稅三千或曰如此縣官
歲失錢億萬計齊立曰安有民富而國家貧者耶知
誥從之由是江淮間曠土盡闢桑柘滿野國以富彊
宋昭未詳何許人宣和四年上書除名勒停送廣南編
管

宋搏字鵬舉萊州人治毛詩得第祥符初進刑部郎中
仲七百六十八

姓慕高辛氏才子八元仲堪仲熊之後以王父字為氏一云魯桓公子慶父子孫號仲孫亦為仲氏又仲虺為湯左相子孫氏焉仲尼弟子有仲由字子路

家語子路曰由願得當一隊而敵必也攘地千里搴旗執馘惟由能之見於孔子曰家貧親老不擇祿而仕昔者由也常食藜藿之實為親負米百里之外

史記仲由字子路卞人也好勇力志伉直冠雄雞佩玃

豚

貢七百六十九

姓纂仲尼弟子端木賜字子貢之後以王父字為氏
前漢貢禹字少翁琅邪人以明經潔已著聞徵為博士
舉賢良為河南令以職事為府官所責免冠謝禹曰
冠一免安復可冠也遂去官後徵為諫大夫遷光
祿大夫上書乞骸骨報曰朕以生有伯夷之廉史魚
之直守經據古不阿當世令未得久聞生之奇論也
其強飯慎疾以自輔

雍 七百七十

本於龍反俗呼去聲今附上平聲

衆 七百七十一

魯大夫衆仲之後

用 七百七十二

風俗通云古有用國見毛詩漢有高唐令用虬名士錄

有高士用羽

絳 七百七十三

晉人絳縣老氏之後

巷 七百七十四

毛詩周巷伯之後

冀 七百七十五

姓纂左傳冀國今晉州翼氏是也又晉大夫郄芮食
采冀邑亦為冀氏

北史儒林冀雋字僧雋性沈謹善隸書特工模寫周文
引為記室

義

七百七十六

風俗通義伯陽卿也

前漢酷吏義縱河東人為長安令直法行治不避貴戚
遷南陽太守吏民重足一迹徙定襄太守郡中不
寒而慄

魏

七百七十七

姓纂周文王第十五子畢公高受封於畢裔孫萬仕
晉封於魏至犇絳舒代為晉卿後分晉為諸侯稱王

至假為秦所滅子孫以國為氏

左傳襄四年魏絳曰和我有五利焉公說使魏絳盟諸

戎脩民事田以時絳無二志事君不避難晉侯

賜樂絳始有金石之樂魏絳魏莊子也晉卿

昭五年韓起之下魏舒范鞅皆諸侯之選也魏獻子

舒莊子之子

昭十三年晉文公好學不二有魏犇賈佗為之股肱

魏犇者晉大夫是為魏武子祖曰畢萬

昭二十八年晉魏獻子為政以魏戌為梗陽大夫謂能守業者也戌之為人也遠不忘君居利思義仲尼聞魏子之舉也以為義曰近不失親遠不失舉可謂義矣

成十八年晉悼公即位使魏相魏頡為卿相魏錡子頡魏穎子

宣十二年魏錡夜至於楚軍席於軍門之外 魏錡晉

大夫食於昌又曰呂錡

宣子五年魏顥敗秦師于輔氏獲杜回 初武子有嬖
妾無子武子疾命顥曰必嫁是疾病則曰必以為殉
及卒顥嫁之及輔氏之役顥見老人結草以抗杜回
回躡而顥 魏顥以其身却退秦師于輔氏親止杜
回其勲銘於景鐘

史記魏冉秦昭王母宣太后弟也昭王以為相封於穰
號曰穰侯

前漢魏相字弱翁濟陰定陶人少學易舉賢良對策高

第茂陵令遷河南太守禁止姦邪豪強畏服 徵為
大司農遷御史大夫為丞相 白去副封以防壅蔽
總領衆職甚稱上意 務在奉行故事數條漢興國
家便宜行事奏請施行與丙吉同心輔政為人嚴毅
不如吉寬

後漢魏霸字喬卿濟陰人世有禮義兄弟同居州里慕
其雍和舉孝廉為鉅鹿太守

儒林魏應字君伯受魯詩舉明經除文學教授徒衆常

數百人永平初為博士 時白虎觀講五經同異肅
宗使應專掌難問

蜀志魏延字文長數有戰功遷牙門將軍先主欲得重
將以鎮漢川乃拔延為鎮遠將軍領漢中太守一軍
盡驚

晉書魏舒字陽元累遷後府將軍鍾毓長史毓每與參
佐射舒常為畫籌而已後遇朋人不足以舒數舒容
範閒雅發無不中舉坐愕然莫不敵者毓歎而謝曰

吾之不足以盡卿才有如此射矣豈一事哉 文帝
深器重之曰魏舒堂堂人之領袖遷宜陽滎陽二郡
太守甚有聲稱 為冀州刺史以簡惠稱祿賜散之
九族家無餘財位至司徒稱疾遜位晉興以來三公
能辭榮善終者未之有也

魏浚為平陽太守 子該為河東順陽二郡太守

魏詠之字長道家貧躬耕好學不倦後為荊州刺史初
在布衣不以貧賤為耻及居顯位亦不以富貴驕人

北史魏收字伯起漢魏無知之後父子建字敬忠仕魏
為益州刺史布以恩信遠近清靜自出為藩牧居脂
膏之中正身潔已不以財利經懷 收少機警不持
細行後折節讀書以文章顯初授太學博士後兼散
騎常侍聘梁收辭藻富逸梁主羣臣咸加敬異 魏
帝曾大射普令賦詩收詩末云尺書徵建鄴折簡召
長安 及作魏書每言何物小子敢與魏收作色舉
之則使上天抑之當使入地

魏長賢祖釗字顯義有當世才知名梁楚淮泗之間長賢博涉經史詞藻清華舉秀才後轉著作佐郎

魏李景弱冠有名京師仕魏歷大司農卿子澹字彥

深仕隋遷著作郎

魏蘭根為岐州刺史部內麥多五穗田鼠為災犬牙不

入岐境

魏玄字僧智少慷慨有膽略仕周遷熊州刺史政存簡

惠百姓悅之

循吏魏德深遷貴鄉長為政清靜不嚴而肅轉館陶長
既至老幼如見父母二縣父老爭請留之郡不能決
會使者至乃斷從貴鄉館陶衆庶因從而居者數百
家

唐魏徵字元成魏州人太宗即位拜諫議大夫引至卧
內訪天下事徵自以才不世遇乃展盡底蘊凡二百
餘奏無不剴切當帝心者帝問為君何道而明何失
而暗徵曰君所以明兼聽也所以暗偏信也以秘書

監參預朝政貞觀四年歲斷死罪二十九幾至刑措
米斗三錢帝曰此徵勸我行仁義效也徵曰五帝三
王不易民而教行帝道而帝行王道而王 帝幸九
成宮李靖王珪繼至吏改館以舍靖珪帝聞怒曰何
輕我宮人詔按之徵曰靖珪皆腹心大臣宮人止後
宮掃除隸耳以此按吏且駭天下耳目帝悟寢不問
帝自比為金以徵為良匠而加礪焉 文德皇后
既葬帝即苑中作層觀以望昭陵引徵同登徵熟視

曰臣以為陛下望憲陵若昭陵臣固見之帝泣為毀
觀尋以定五禮當封一子縣男徵請封孤兄子帝
愴然曰此可以勵俗許之帝宴積翠池賦詩徵賦
卒章曰終藉叔孫禮方知皇帝尊帝曰徵未嘗不約
我以禮帝問政治如何徵見久承平帝意有所忽
因對曰貞觀之初專人使諫三年以後見諫者悅而
從之比一二年勉強受諫而終不平也帝悟曰非公
無能道此者人苦不自覺耳時上封事者衆帝厭

之徵曰古者立謗木欲聞已過封事其謗木之遺乎
帝悅皆勞遣之 後皇太子承乾與魏王泰交惡帝

曰當今忠謇貴重無踰徵遣傳太子一天下之望羽
翼固矣後帝臨朝歎曰以銅為鑑可正衣冠以古為
鑑可知興替以人為鑑可明得失朕嘗保此三鑑今
魏徵逝一鑑亡矣 狀貌不踰中人有志膽每犯顏
進諫天子亦為霽威 奏引諸儒校集秘書國家圖
籍粲然完整 徵亡帝思不已登凌煙閣觀畫像賦

詩悼痛 遼東之役軍還悵然曰魏徵若在吾豈有
此行邪復立碑四子叔玉叔琬叔璘叔瑜 叔瑜為
豫州刺史善草隸以筆意傳其子及甥薛稷世稱善
書者前有虞褚後有薛魏

魏謩字申之徵五世孫文宗讀貞觀政要思徵賢詔訪
其後楊汝士薦為右拾遺安宇魁秀帝異之詔曰謩
為拾遺屢有獻納朕何愛一官增直臣之氣其以謩
為右補闕俄為起居舍人帝索起居注謩奏古置左

右史以存鑒戒陛下見則後所書必有諱屈乃止
文宗問暮家書暮對惟故笏在帝曰此笏乃今甘
棠宣宗嗣位遷御史中丞俄兼戶部侍郎進同平
章事為宰相議事天子前惟暮謹切無所回畏宣宗
嘗曰暮名臣孫挺挺有祖風烈朕心憚之

魏元同字和初定州人擢進士第遷吏部侍郎與裴
炎締交能保終始故號耐久朋

魏元忠宋州人為太學生儀鳳中吐蕃數盜邊上封事

請命將用兵之要高宗善之遷監察御史 聖歷二
年為鳳閣侍郎同平章事檢校洛州長史治號威明
張易之家奴暴百姓橫甚笞殺之權豪憚服 初相
武后有清正名 元忠始名真宰以太學諸生見高
宗高宗慰遣不知謝即出儀舉自安帝目送謂薛元
超曰名不虛謂真宰相也

魏知古深州人方直有雅才擢進士第拜黃門侍郎多
諫疏知東都吏部選事以稱職聞 宋璟歎曰叔向

有遺直子產有遺愛兼之者其魏公乎

魏少游邢州人以吏幹稱少游四為京兆雖無赫赫名然善任人緣飾規檢有足稱者

宋朝魏仁浦字道濟衛州汲人也少為刀筆吏隸樞密院周太祖為樞密使問以卒乘數仁浦對曰帶甲者六萬太祖喜曰天下事不足憂也漢隱帝遣使害太祖仁浦曰公有大功於朝廷握彊兵臨重鎮以讒見疑豈可坐而待死教以易其詔云誅將士以激怒衆

心太祖納其言遂長驅度河及即位以為樞密承旨
世宗時為樞密副使陞樞密使拜中書侍郎同中書
門下平章事集賢殿大學士兼樞密使始議者以仁
浦不由科第進世宗曰顧才如何爾遂用之恭帝嗣
位加刑部尚書國初進位右僕射乾德初罷開寶二
年春宴太祖笑謂仁浦曰何不勸朕酒乎仁浦奉觴
上壽太祖密謂之曰朕欲征太原如何仁浦曰欲速
不達太祖頷之從征太原至梁侯驛遇疾而卒仁浦

性寬厚接士有禮專務以德報怨世宗辨急輕殺戮
仁浦營救而免者十常七八從出征鋒鏑之下而無
一人橫死者有鄭元昭者為解州刺史仁浦婦翁李
溫玉為權鹽使元昭不得專其利乃誣溫玉之子從
李守貞叛捕以告變欲中傷仁浦周太祖為辨其誣
獲免及仁浦用乃以元昭典五郡又嘗為賈延徽諸
幾遇禍總師出征有得延徽以獻者仁浦曰因兵戈
以報怨不忍為也人稱其長者諡曰宣獻後以子咸

信尚主追封齊

季

七百七十八

姓纂陸終氏之子李連之後一云魯桓公子季友之後亦為季氏 漢功臣表戚圉侯季必傳封四代

左傳僖元年公賜季友汶陽之田及費

襄十九年季武子以所得於齊之兵作林鐘而銘魯功焉

成十六年宣伯曰魯之有季孟猶晉之有欒范也政令

於是乎成

文六年夏季孫行父如陳秋季孫行父如晉 季文子

魯卿季孫行父也季友之孫是為季孫 鄭伯與公

宴於棐文子賦采芣之四章 臧文仲教行父事君

之禮行父奉以周旋 文子卒無衣帛之妾無食粟

之馬無藏金玉無重器脩君子於是知文子之忠於

公家也相三君而無私積 季孫宿季文子之子是

曰季武子

季梁隨大夫也楚武王侵隨少師請追楚師季梁止之
曰天方授楚楚之羸其誘也

家語孔子曰季孫之賜我粟千鍾而交益親

國語定王使劉康公聘於魯發幣於大夫季文子孟獻
子皆儉歸王問魯大夫孰賢對曰季孟其長處魯乎
論語季康子問使民敬忠以勸季文子三思而後行
史記季布楚人也尚氣任俠有名於楚為河東守孝文
時人有言其賢者召欲以為御史大夫復有言其使

酒難近至留邸一月見罷布進曰陛下以一人之譽而召臣以一人之毀而去臣臣恐天下聞之有以窺陛下上曰河東吾股肱郡故特召君耳楚諺曰得黃金百斤不如得季布一諾 弟季心氣蓋關中遇人恭謹為任俠方數千里士皆爭為之死少年多時時竊籍其名以行季心以勇布以諾聞關中

摯

七百七十九

風俗通摯疇古諸侯國也見毛詩周有摯荒

晉摯虞字仲治作思游賦舉賢良策為下第武帝又詔
諸賢良會東堂策問擢為太子舍人除聞喜令撰
族姓昭穆十卷後歷光祿勳太常卿

費

亦音秘
七百八十

姓纂史記云紂幸臣費仲夏禹之後蜀譜云益州諸
費有名位者多

左傳昭十九年楚生太子建及即位費無極為少師
前漢儒林費直字長翁東萊人治易長於卦筮

後漢費長房汝南人從市中老年仙後辭歸翁與一竹杖曰既至可投葛陂中顧視則龍也

蜀志費詩字公舉率意而言皆有可紀為牂牁太守

費禕字文偉為黃門侍郎諸葛亮表其志慮忠純宮中之事無大小悉以咨之必能裨補闕漏有所廣益孫權器之曰君天下淑德必當股肱蜀朝奉使稱旨煩煩至吳

北史費穆字朗興代人也宣武初遷涇州刺史

智七百八十一

左傳云晉卿荀林父之孫荀瑩別食智邑又為智氏

賜七百八十二

仲尼弟子端木賜之後以王父名為氏

騎七百八十三

史記燕將有騎劫

稚七百八十四

殷後見史記

遂 七百八十五

左傳有遂國齊人殲于遂因氏焉其後並以遂為姓

貳 七百八十六

楚屈瑕將盟貳軫並小國也後秦錄平陽太守貳塵

肆 七百八十七

風俗通宋大夫肆臣之後漢漁陽太守肆敏子孫因居

之

翠 七百八十八

急就章有翠駕鸞其先楚景翠之後因避難以祖名為氏

利七百八十九

漢有利幾又仙人利真源漢陽人又利乾為中相

次七百九十

次非荆之勇者見呂氏春秋亦作飲

駟七百九十一

左傳鄭穆公子駢字駟之後以王父字為姓漢恩澤侯

表鄔侯駙鈞齊哀王舅

祕七百九十二

漢功臣表戴侯祕彭祖傳封七代西秦錄有僕射祕宜

懿七百九十三

風俗通齊懿公之後姚秦有吏部郎中懿橫

忌七百九十四

風俗通周公忌父之後以王父字為氏

嗣七百九十五

風俗通衛嗣君之後

貴 七百九十六

風俗通陸終之後漢有廬江太守貴遷

尉 又音鬱
七百九十七

左傳鄭大夫尉翩之後

既 七百九十八

風俗通吳人夫槩王之後子孫因避仇改為既氏漢有

安南長史既涼

名賢氏族言行類稿卷四十二

名賢氏族言行類稿卷四十二